

Kerweredd 2023

**Jed Joahr an Fronleichnam un des is koan
Witz,
mach ich emol moin Bleistifd spitz,
un vun mir wird doann nodierd, was im Ord
is so bassierd.**

**Wer hod wann zuviel gedrunge, orrer soim
Nochbarn ned gewunge,
is mim Audo iwwer rot gerennt,
orrer hod uff de Ärwend moiens verpennt.**

**Des wird vun mir dann verpackt un frisierd,
un eisch als Rämschder Kerbredd
präsendierd.**

**Isch griëß eisch all ihr Rämschder Leit,
schee, dass ihr heid Middaach gekumme
seid.**

**Seid Dunnersdoach Owend is in unserem
Ördsche was los,**

**die letzde zwaa Doach woarn schun famos,
un vorhin beim Umzuch wor rischdisch
klasse,
isch heb veel geseje, vun de Rämschder
Asse.**

**Doch bevor vun mir wird in de Kerbredd in
intime Details vorgedrungen, wird vun uns
ersd mol gemeinsam de Rämschder
Kerwemarsch gesungen.**

**Bevor isch jetzd loslegg noch e kurz
Information fer all,
Gejendert, wird vun mir auf keinen Fall,
Des kenne die mache , die sunst koan
Spaß im Lewe hawwe,
isch kümmer misch hier um die
wischdische Sache !**

**Das aus Russland oaner, annern Länner
terrorisiert,
in Berlin die Ampel Kreuz und quer regierd.**

**Wer, wann, was fer e Heizung brauch is
noch ned ganz bekannnd.**

**Isch kumm mer als emol vor wie im Tacca
Tucca Land.**

**Annern dunn sich uff die Stroße klewe,
isch freg misch nur hewwe die nix
sinnvolles zu du in ihrm Lewe ?**

**Un isch bin nur froh, dass do owwe kouner
am Bierwage klebt,**

**weil koan Litschisaft uff de Getränkekart
steht.**

**Mer muss sich ned glei bei allem
radikalisieren, sondern muss ach mol die
Meinung vun jemand annerm akzeptieren.**

**Ach in Mühlthal geht es polidisch alsemol
rund,**

**anstehende Bürgermeisterwahlen sin defer
de Grund.**

**Von sich aus gewollt, un ned erzwunge,
sinn zwaa Kandidat bis jetzd in de Ring
gesprunge.**

Die ersd Kandidatin woar fun den Griene die Linda Frey, die immer uffem Foahrrad hod ihr Schwimnudel debei.

De zweide Kandidat, wer dud en net kenne, Ortsvorsteher vor Ort, dud er sich selwer nenne.

De Nils Starke als echde Rämschter is abizioniert, ihm würd gefalle wann er im Mühlthal regiert un newebei do driwwe de Rathauszirkus dirigiert.

Die SPD, so wurde es mir übermittelt, hatte ach schon en geeignete Kandidade betittelt.

Der hod sich dann die polidische Verhältnisse in Mühlthal 4 Woche lang ogeschaud, hod abgewunge un is wirrer abgehaut.

Oans is zum jetzische Zeitpunkt noch net bekannt,

ob de Fuchs als Kandidat aach noch kimmt aus de Deckung gerannt.

Un ob de Willi dud nochemol ins Renne gehen, dud glaub ich aach noch net sicher feststehe.

Doch falls er sich doch tut zur Rente entschließe,

muss er ja dehoam net nur die Strooße kehrn un gieße sondern er kann sich ja als 520 Euro Jobbler in Mühlthal noch engaschirn un kennt soi selbstgeschaffene Parkverbote kontrolliern.

Un isch schweif aach jetzd ned ab, bei dem Thema wird gebliwwe,

Letztd Joahr um die Zeit hod en neije Ortssherriff in unserm Ord soi Unwesen getriwwe.

Samsdachs mojends um siwwe is der ungenierd,

wie John Wayne in Westernschun dorsch unsern Ord marschierd.

En Gerdel um mid alle Raffienesse, hod er jedem Falschparker im Genick gesesse.

**Mid Handschuh oh un Sunnebrill uff,
schreibt er jeden Verkehrsrowdy uff.**

**Ach unserm Kerwevereinshansi isser
hinnerher gestiege weil der dud ohne Helm
uff, mim Mofa beim Gewel aussem Hof
raus bieje.**

**Es Blaulicht ooh un uff de Kreizung
gedreht,**

macht er em HASI hinnerher was nur geht.

**An de Freizeitecke dud er de Hans-
Christian dann erwische, un willem
nadierlich glei en Knolle uffdische.**

**Doch de HC dud die Gass nunner ned
foahrn sondern nur Rolle un dodefier gids
haltemol koan Knolle.**

**Doch mim neije Sheriff kams wie es
kommen muss,**

**er tanzte nur einen Sommer un dann woar
Schluss.**

Offizielle Aussage:

**Der Kerl is nur fort weil er verdient
woanners besser Geld als in unserm Ort.**

**Inoffiezell wurd er vun de Verwaltung
wirrer vortgetrieben, denn angeblich häd er
zuviel vun de eigene Kollege
uffgeschrieben.**

**Doch jetzd issn neije Ordssherriff
unnerwegs in unsere Gasse un aach der
kann es Knolleschreibe oafach ned lasse.**

**Mol gugge wie lang der Bleistift un Block
aussem Halfter dud zügge orrer sich aach
glei wirrer dud verdrigge.**

**Die negsd Geschischd, die stell ich euch
dar,**

**handelt von em Jubilar, denn Jubiläen des
sinn dolle Dinge, es gidd meistens was zu
Dringe un manche dunn singe.**

**Es stelle sisch meisdens sie selwe Rituale
ein,**

**egal ob beim Hase, Kegel orrer
Fußballverein.**

**Ach unsern Jubilar hot en besondere
Verdienst,**

40 Joahr im öffentliche Dienst.

Un oans is dobei werglisch klasse, fast 40 Joahr do driwwe im Rathaus, bei dene Asse.

Weil so e lang Zeit kriegd ned jeder hie, do muss mer schmerzfrei soi, sonst land mer in de Physiatrie.

E poor Bojemasder verschlisse, von Arbeitskollege ganz zu schweige / aach etliche Polidiker dunn in 40 Joahr ihr unwesen treiwe.

Doch des alles raffte unsern Jubilar net dahin,

er hoggd immer noch in soim Eggbüro drin.

Jetzd isses fast klar, die meisde wern den Blasshäutische kenne,

**deshalb kann isch de Thomas Karl aach
beim Namen nenne.**

**Un so hod mer sich von de Verwaltung ned
lang geziert,**

**un hod a Jubiläumsfeierstun / fer de
Thomas arrangiert.**

**Mer hod Getränke oigekaft, e Redd
vorbereitet un a Lied oistudiert un
nadierlich aach e poar belegde Wegg
arrangierd.**

**Nur ans hod mer vergesse, des is moin
Ernst, ihr dud misch kenne,**

nämlich em Thomas de Termin zu nenne.

**Denn so woar die Jubelfeier vorbereitet
midem haufe Leit,**

**doch de Thomas hatte an dem Termin
gor ka Zeit.**

**Un so mussd mer unner mancher Klage,
erstmol de Termin absage.**

**Bei de neije Terminfindung woar de
Thomas integriert un so wurde dann aach
en Termin generiert.**

**Da gab es dann e Feier mid großem Trara,
un de Thomas woar nadierlich aach
diesmal da.**

**Lieb Verwaltung, ihr müsstd grundsätzlich
mol lerne besser zu kommunizieren,
weil dann dunn ach so Fehler ned meh
bassieren.**

**Als negsdes steht in moin Berischd,
a Kriminaltechnisch Geschichd, un um ein
Haar wär es bassierd
und die wurd fasd fer de „xy Preis“
nominiert.**

**En Rämshder Kerweborsch mittendrin
statt nur debei,
ewwer als Täter sprech ich en frei,
un isch sags eisch glei wies werglich ist,
er woar sozusage de Hilfspolizist.**

**Debei wolld er nur soi Freundin besuche,
im Audo had er Blume un Kuche.**

**Am Ortseingang vun Owwer Ramschd dud
er zielsicher Rischdung Freundin steiern,
als a Audo vor ehm fängd oh rumzueiern.**

**Er dengd sisch glei, do leefd was verkehrd,
wenn des Audo vor mer Schlangelinie färd.
Unso nimmd unsern Borsch, ich erzähl
koan Stuss,
oafach mol die Verfolgung uff.**

**De negsde Akt im Kriminaltechnische
Spiel,**

bassierd unweit vun de Hammermiehl.

**Unsern Borsch dengd nur Oh Gott un
verdammt,**

**der hod mid soim Waache grad a geparkt
Audo gerammt.**

**Un jetzd de Klüh in der Geschichde,
er setzd zurück un dud oafach flüchde.**

**Unsern Kerweborsch steht im Gesicht
noch es entsetze,**

**doch er dud sofort en Notruf an die Polizei
absetzte.**

**Beck is mein Name, ihr müsstd schnell mol
Kumme,**

**vor mer hod oaner e geparkt Audo volley
genumme,**

**doch des hodden ned gestört, der tritt uffs
Gaspedal druff,**

isch nehm mol die Verfolgung uff.

Mache se des, segd die Polizei, des is koan Akt,

mer bleiwe iwwers Handy in Kontakt.

Moi Kollesche die dun Sie glei unnerstütze, die dun schon fasd im Bollizeiaudo sitze.

Un so is de Andrè in besder Derrik Manier, dem Audo gefolgd bis vor soi Hausoigangsdier.

Un er segd de Polizei, des woar rischdisch Klasse,

an de Großsporthall hod de Bruchpilot soi Audo verlasse.

Un die hewwe doan aach wie solls anners kumme,

den Typ aach glei mol festgenumme.

Hinnerher un des Stand aach glei fest,

is de Kerl durchgefalle beim Alkoholtest.

**Un unsern Alpaka hod uffgebassd un ned
gedößd,
un hod de Fall fast im Alleingang gelöst.**

**Kerweborscheltern mache sisch oft
Sorsche,
meistens bei de jüngere Borsche.**

**Du ned so viel dringe un kum zeidisch
nach Hause,
du joa was esse un mach beim Singe mol
es Pause.**

**Des alles gewwe se ihr Schützlinge mit,
wenns mol wirrer geht mit de Borsche
uffen Trip.**

**Doch oans fällt ihnen bei ihre Tips nie oi,
Merr muss immer selbst es größte Vorbild
soi.**

**Dies joahr am Fastnachtsumzug in Iwwero,
woar vun oam vun unsere Borsche aach de
Vadder do.**

**Un der hod, des wurde später bekannt,
alle die uffgestellte Regeln fer soim Bu
selbst ned gekannt.**

**Erstmol dud mer schee em Umzug winge,
um doann mid soim Kumpel ordentlich
dorscheinander zu dringe.**

**Das des ned gut geht kann mer schun
ahne,**

**ewwer die zwaa ziehe weiter ihre Bahne,
un das se ned friern, dodriwwer sin mer
froh,**

**hewwe die zwaa aach noch e Bärenkostüm
oh**

**Un so dabbe die zwaa in Iwwero rum,
un dringe Bier, Äppler un Cola mid Rum**

**Un irgendwann woars dann hald mol
soweid,
de Körper hod de Harndrang oigeleit.**

**Un sie suche ned nooch Kloos in
irgendwelche Winkeln,
sondern sie wolle grad in die Gersprenz
pinkeln.**

**Am Ufer finden die zwaa doan e Plätzje,
mache es Bärnfell uff un holle raus es
Spätzje.**

**Doch sie kenne ned grad steh, de Alkohol
zeigt soi Wirkung glei,
un so falle se beim pinkle in die Gersprenz
noi.**

**Saschnass un dreggisch, es Bärenfell
noch uff,
krawwele se dann wirrer de Roa enuff.**

**De Fastnachtssunndag wurde dann für
zuende erklärt,
un mer is pitschnass noach Reunem
gelaafe wo de Zug Richtung Mühlthal fährt.**

**Eisch zwaa Agende, koann mer werglisch
nix haase,
ewwer es gute is, die sinn ned aus
Ramscht sondern aus Traase.**

**Es moralische Ende vun der Geschichd
dud jetzt kumme,
unsern Kerweborsch hod sich nämlich in
Iwwero benumme,
Un häd de Vadder soi Ratschläg selbst
praktiziert,
wer er ned nass un dreggisch vun Iwwero
hoam marschierd.**

**So ihr Leit, des klingt zwar dumm, ewwer
die Kerweredd die is jetzt rum.**

**Wenns eisch gefalle hod kennd ihr jetztd
applaudieren,**

**un mir un moine Borsche mol a Biersche
spendiern.**

**Dud noch was tringe, esse un schwätze,
Kerb is nur oamol im Joahr, des muss mer
schätze.**

**Heit Owend is wirrer Mussigg uff unsere
Bihn,**

**R3 Lounge wird eisch zum groove
inspiriern.**

**Un moje frieh um 11, was isch misch schun
fraa,**

**is de Fischer Peter aach wirrer zum
Friehschoppe da.**

**Do dunn mer de letzde Kerbdaach ganz
zünfdisch beginne,**

**dann schee oaner dringe un aach e poar
Lieder o stimme.**

**Un owends dann, isch sags mid oam Satz,
speeld „Pfund“ un do fliggd bestimmd
vernanner de Platz.**

**Un am Dienstag dann, des klingd zwar
dumm,
is fer 1 Joahr unser schee Kerb wirrer rum.**

**Doch jetzt ihr Rämschter, wird noch
gefeierd**

**Un seid gligglisch un bleibt froh,
denn die Rämschter Kerb is do !**

_____Kerwemarsch _____